

## **COLD CLIMATE HVAC 2009 – Nunarsuaq tamakkerlugu peqataaffigineqartoq Sisimiuni**

Ulluni 16 – 19 marts nunarsuaq tamakkerlugu peqataaffigineqartumik isumasioqatigiittoqassaaq qulequtaqartumik Cold Climate HVAC 2009. Tamanna Sisimiuni ingerlanneqassaaq, Kulturip Illorsuani Taseralimmi aamma Sanaartornermut Ilinniarsiup initaavini. Ataatsimeersuarnermi sammineqassapput ilusilersuisarnerit, atortut qanoq atorineqartarneri, silaannaap pissusai kiisalu nunarsuup ilaani issittumi inissianik sanaartortarnek, ingerlatsineq aserfallatsaaliuisarnerillu. Isumasioqatigiittarnerit taamaattut ukiut pingasukkaarlugit, nunarsuatsinni sumiiffinni qaasuitsup killeqarfiata (polarcirklen) qanittuani, ukioq mannaluu tassa pissaaq Sisimiuni. Ataatsimeersuarnissami ilisimatuut, illussanik titartaasartut, ingeniør, illuliortitsisartut, sanaartortartut (entreprenør) allallu illuliornernut soqutigisallit 100-it missaat peqataassapput. Peqataasussat kangitsinnit Kina-miit kititsinnut Canadamit aggersuussapput.

Soorluttaaq Olumpiadeqarnerani illoqarfimmut Olympiadeqarfiusumut ataqqinaataasartoq, taamatuttaaq illoqarfimmut Cold Climate HVAC-p sumiiffissaanut toqqarneqartumut ataqqinaataasartorujussuuvoq. Immikkut annertuumik tulluusimaarnartuullunilu ataqqinaataavoq Cold Climate HVAC 2009 ingerlanneqarnissaa Kalaallit Nunaanni, Sisimiuniittussanngorlugu iluatsinneqarmat, Sisimiut qaaqquisutut illoqarfiussalluni. Tamannalu tulluarluinnarpoq, tassa Sisimiut nunarsuatta ilaani issittumiippoq, qaasuitsup killeqarfiata eqqannguani, ataatsimeersuarnermi ilisimasat ilinniarsimasallu tungaasigut tapersorneqarnissaminut periarfissarissaarluni Sisimiuni Sanaartornermut ilinniarfik, Danmarks Tekniske Universitet-imut attaveqartoq, aqutigalugu. Periarfissarlu tamanna pitsaalluinnartuuvoq. Ataatsimeersuarnissap piareersarneqarnerani pingaartinneqarsimavortaaq peqataasut kalaallit nunaanni pinngortitarsuarmik kusanartumik takusaqarlutillu misigisaqarnissaat kulturikkullu pisussanik aaqqissuussiffigineqarnissaat.

Cold Climate HVAC siornatigut Finland-imi, Islandimi, Japan-ini, Norge-mi Ruslandimilu ingerlanneqartarsimavoq, tullianilu 2012-mi Canada-mi ingerlanneqassalluni.

Ataqqinartorsuaq Kunngissaq Frederik ataatsimeersuarnissamik illersuisuuvoq. Ajoraluartumilli ataatsimeersuarnerup ammarneqarnissaanut peqataasinnaanani nalunaarsimavoq, kisiannili ataatsimeersuurtussat iluatitsilluarnissaanik angusaqarluarnissaannillu kissaassimallugit.

[www.coldclimate2009.dk](http://www.coldclimate2009.dk) –mi annertunerusunik paasisaqartoqarsinnaavoq.

Bent Michael Nielsen  
Aaqqissuuseqatigiinni siulittaasoq

Kulturikkut aaqqissuussinerni uku peqataassapput:

Sisimiuni kalattoortartut, supputaasartulerlutik

Sisimiut Teenage Dancers

Uajeertartoq Bendo Schmidt

Erinarsortartoq Juaaka

Sisimiuni erinarsoqatiguit

Six Foot Stompers, Lone Josefsen aamma Pele Møller